

官常典第一百三十五卷

勳爵部彙考七

北齊

北齊制王公侯伯子男自一品至五品又有驃騎諸將軍自一品至九品以褒賞勳庸 按隋書百官志王位列大司馬上置師一人餘官大抵與梁制不異其封內之調盡以入臺三分食一公已下四分食一王爲第一品開國郡公爲從一品開國縣公爲第二品開國縣侯爲從二品開國縣伯爲第三品散縣伯爲從第三品開國縣子爲第四品散縣子爲從第四品開國縣男爲第五品散縣男爲從第五品自一品已下從九品已上又有驃騎車騎衛四征四鎮中軍鎮軍撫軍翊軍四安冠軍輔國龍驤鎮遠安遠建忠建節中堅中壘振威奮威廣德弘義折衝制勝伏波陵江輕車樓船勁武昭勇明威顯信度遼橫海踰岷越嶂戎昭武毅雄烈恢恢猛揚摩曜鋒蕩邊開城靜漠綏戎平越殄夷飛騎隼擊武牙武奮清野橫野偏裨等將軍以褒賞勳庸 按杜氏通典諸王三公儀同尚書令五等開國太妃公主恭拜冊軸一枚長二尺以白練衣之用簡十二枚六枚與軸等六枚長尺二寸

古今圖書集成
文出集書皆篆字哀冊贈冊亦同諸王五等開國及鄉男恭拜以其封國所在取社壇方面土苞以白茅內青箱中函方五寸以青塗飾封授之以爲社

文宣帝天保元年詔降魏朝封爵遂大封功臣及蕭綸皆爲王 按北齊書文宣帝本紀天保元年夏五月乙丑詔降魏朝封爵各有差其信都從義及宣力霸朝者及西來人并武定六年以來南來投化者不在降限六月辛巳又詔封功臣庾狄干爲章武王斛律金爲咸陽王賀拔仁爲安定王韓軌爲安德王可朱渾道元爲扶風王彭樂爲陳留王潘相樂爲河東王秋九月癸丑詔梁侍中使持節假黃鉞都督中外諸軍事大將軍承制邵陵王蕭綸爲梁王 按通鑑綱目天保元年九月梁湘東王繹取郢州邵陵王綸奔齊昌侯景兵襲之綸遂奔齊齊以爲梁王

孝昭帝皇建元年詔訪功臣子孫後 按北齊書孝昭帝本紀皇建元年秋八月乙酉詔自太祖創業已來諸有佐命功臣子孫絕滅國統不傳者有司搜訪近親以名聞當量爲立後丙申詔九州勳人有重封者聽分授子弟以廣骨肉之恩

北周制五等封爵皆加開國而加官則各視所授之職後亦增改無常 按周書盧辯傳周制封郡縣五等爵者皆加開國授柱國大將軍開府儀同者並加使持節大都督其開府又加車騎大將軍散騎常侍其授總管刺史則加使持節諸軍事以此爲常大象元年詔總管刺史及行兵者加持節餘悉罷之建德四年增置上柱國大將軍改儀同三司爲儀同大將軍 按隋書禮儀志後周諸

公之服九一曰方冕九章二曰衮冕九章宗彝已上五章在衣藻已下四章在裳三曰山冕八章衣裳各四章衣重宗彝爲九等四曰鷩冕七章衣三章裳四章衣重火與宗彝五曰火冕六章衣裳各三章衣重宗彝及藻裳重黼六曰毳冕五章衣三章裳二章衣重藻粉米裳重黼山冕已下俱九等皆以山爲領標冕俱九旒七曰皐弁八曰皮弁九曰元冠諸侯服自方冕而下八無衮冕山冕八章衣裳各四章鷩冕七章衣三章裳四章衣重宗彝火冕六章衣裳各三章衣重藻裳重黼毳冕五章衣三章裳二章衣重粉米裳重黼鷩冕已下俱八等皆以華蟲爲領標冕俱八旒諸伯服自方冕而下七又無山冕鷩冕七章衣三章裳四章火冕六章衣裳各三章裳重黼毳冕五章衣三章裳二章裳重黼火冕已下俱七等皆以火爲領標冕俱七旒諸子服自方冕而下六又無鷩冕火冕

古今圖書集成
六章衣裳各三章毳冕五章衣三章裳二章裳重黻毳冕已下俱六等皆以宗彝爲領標冕俱六旒
諸男服自方冕而下五又無火冕毳冕五章衣三章裳二章以藻爲領標冕五旒

孝閔帝元年詔封諸功臣又詔不霑爵封者各授兩大階 按周書孝閔帝本紀元年春正月乙卯
詔曰惟天地草昧建邦以寧今可大啟諸國爲周藩屏於是封太師李弼爲趙國公太傅趙貴爲楚
國公太保獨孤信爲衛國公大司寇于謹爲燕國公大司空侯莫陳崇爲梁國公邑各萬戶秋九月
庚申詔曰朕聞君臨天下非由一人時乃上下同心所致今文武之官及諸軍人不霑爵封者宜各
授兩大階

明帝武成元年封諸功臣並賜錢帛以恤死亡高陽公達奚武等各進封國邑萬戶 按周書明帝
本紀武成元年夏六月庚子詔曰潁川從我是曰元勳無忘父城實起王業文考屬天地草昧造化
權輿拯彼橫流匡茲頽運賴英賢盡力文武同心翼贊大功克隆帝業而被堅執銳櫛風沐雨永言
疇昔良用慙然至若功成名遂建國剖符予惟休也其有致死王事妻子無歸者朕甚傷之凡是從
先王向夏州發夏州從來見在及薨亡者並量賜錢帛稱朕意焉秋九月辛未進封高陽公達奚武

爲鄴國公武陽公豆盧寧爲楚國公博陵公賀蘭祥爲涼國公寧蜀公尉遲迴爲蜀國公化政公宇文貴爲許國公陳留公楊忠爲隋國公昌平公尉遲綱爲吳國公武威公王雄爲唐國公邑各萬戶
武帝保定元年冬十一月乙巳封柱國廣武公寶熾爲鄧國公 按周書武帝本紀云云

保定二年詔封國未錫租賦者寄食他縣封賀拔緯爲霍國公 按周書武帝本紀保定二年夏四

月癸亥詔曰比以寇難猶梗九州未一文武之官立功效者雖錫以茅土而未及租賦諸柱國等勳

德隆重宜有優崇各准別制邑戶寄食他縣秋七月己巳封開府賀拔緯爲霍國公 按李和傳和

朔方巖綠人初以軍功封永豐縣公二年改封德廣郡公薨諡曰肅子徹嗣

保定三年改定世襲封爵 按周書武帝本紀三年秋九月己丑初令世襲州郡縣者改爲五等爵

州封伯郡封子縣封男

保定四年秋九月丁巳封開府李虎爲唐國公若干鳳爲徐國公 按周書武帝本紀云云

天和二年夏五月丁丑進封柱國安武公李穆爲申國公 按周書武帝本紀云云

天和五年封韋孝寬梁睿爲國公 按周書武帝本紀天和五年春三月辛卯進封柱國韋孝寬爲

鄆國公夏六月壬辰封開府梁睿爲蔣國公

天和六年封斛斯徵長孫覽皆爲國公 按周書武帝本紀六年夏四月庚子封開府斛斯徵爲岐國公右宮伯長孫覽爲薛國公

建德三年秋八月乙未詔自建德元年八月以前犯罪未被推糾於後事發失官爵者並聽復舊

按周書武帝本紀云云

建德五年封齊降將韓建業賀拔伏恩及功臣丘崇姬願尉遲運皆爲國公 按周書武帝本紀建

德五年冬十二月丙辰師次介休齊將韓建業舉城降以爲上柱國封郇國公丁巳大軍次并州詔僞將相王公已下衣冠士民之族如有深識事宜建功立效官榮爵賞各有加隆若下愚不移守迷莫改則委之執憲以正刑書嗟爾庶士胡寧自棄自是齊之將帥降者相繼封其特進開府賀拔伏恩爲鄆國公其餘官爵各有差庚申并州平丙寅封大將軍廣化公丘崇爲潞國公神水公姬願爲原國公廣業公尉遲運爲盧國公諸有功者封授各有差

建德六年封齊洛州刺史獨孤永業爲國公論定諸軍功勳 按周書武帝本紀六年春正月甲午

封齊開府洛州刺史獨孤永業爲應國公二月丙午論定諸軍功勳置酒於齊太極殿會軍士以上班賜有差

宣政元年宣帝卽位封于智王誼俱爲國公 按周書宣帝本紀宣政元年六月戊戌帝卽位甲子封開府于智爲齊國公閏月辛巳封桂國平陽公王誼爲揚國公 按周書宣帝本紀云云

宣帝大象元年封鄭譯等爲國公 按周書宣帝本紀大象元年春二月辛巳封內史上大夫鄭譯爲沛國公秋八月甲戌封開府楊雄爲邗國公乙弗實戴國公

大象二年靜帝封辛威等爲國公進隋公楊堅爵爲王 按周書靜帝本紀二年夏五月己酉宣帝崩帝入居天臺秋八月丁卯封上柱國杞公辛威爲宿國公開府怡昂爲鄆國公九月庚戌以柱國常山公于翼化政公宇文忻並爲上柱國進封翼爲任國公忻爲英國公冬十二月甲子大丞相隋國公楊堅進爵爲王以十郡爲國

靜帝大定元年更封楊堅并前二十郡備九錫之禮位諸王上 按周書靜帝本紀大定元年春二月庚申大丞相隋王楊堅爲相國總百揆更封十郡通前二十郡劍履上殿入朝不趨贊拜不名備

古今圖書集成
九錫之禮加璽鉞遠遊冠相國印綠綬綬位在諸王上又加冕十有二旒建天子旌旗出警入蹕乘金根車駕六馬備五時副車置旄頭雲罕樂舞八佾設鐘虡宮懸王后王子爵命之號並依魏晉故事甲子隋王楊堅稱尊號帝遜於別宮

隋

隋制列爵九等又置勳級十一等煬帝立唯留王公侯三等按隋書百官志隋制國王郡王國公郡公縣公侯伯子男凡九等又採後周之制置上柱國柱國上大將軍大將軍上開府儀同三司開府儀同三司上儀同三司儀同三司大都督帥都督都督總十一等以酬勤勞煬帝立唯留王公侯三等餘並廢之按禮儀志臨軒冊命諸王陳車輅百司定列內史令讀冊訖受冊看拜受出又引次受冊者如上儀若冊開國郊社令奉茅土立於仗南西面每受冊訖授茅土焉

文帝開皇元年詔降周氏王爵爲公又詔前代品爵悉仍舊制按隋書高祖本紀開皇元年二月甲子上卽皇帝位己巳詔周氏諸王盡降爲公三月庚子詔曰自古帝王受終革代建侯錫爵多與運遷朕應籙受圖君臨海內載懷弘革事有不同然則前帝後王俱在兼濟立功立事爵賞仍行苟

利於時其致一揆何謂物我之異無計今古之殊其前代品爵悉可依舊

開皇十七年詔勳臣子孫宜量才升用俾享世祿 按隋書高祖本紀十七年夏四月壬午詔曰周曆告終羣凶作亂疊起蕃服毒被生人朕受命上元廓清區宇聖靈垂祐文武同心申明公穆鄭襄公孝寬廣平王雄蔣國公睿楚國公勣齊國公頴越國公素魯國公慶則新寧公長乂宜陽公世積趙國公羅雲隴西公詢廣業公景真昌公振沛國公譚項城公子相鉅鹿公子幹等登庸納揆之時草昧經綸之日丹誠大節心盡帝圖茂績殊勳力宣王府宜弘其門緒與國同休其世子世孫未經州任者宜量才升用庶享榮位世祿無窮

煬帝大業二年秋七月壬戌擢藩邸舊臣鮮于羅等二十七人官爵有差 按隋書煬帝本紀云云大業六年官以後唯有功勳乃得賜封仍令子孫承襲 按隋書煬帝本紀大業六年春二月乙卯詔曰夫帝圖草創王業艱難咸仗股肱叶同心德用能拯厥頽運克膺大寶然後疇庸茂賞開國承家誓以山河傳之不朽近代喪亂四海未一茅土妄假名實相乖歷茲永久莫能懲革皇運之初百度伊始猶循舊貫未暇改作今天下交泰文軌攸同宜率遵先典永垂大訓自今已後唯有功勳乃

古今圖書集成
得賜封仍令子孫承襲

大業八年詔勳官不得授文武職事 按隋書煬帝本紀八年秋九月己丑詔曰軍國異容文武殊用匡危拯難則霸德攸興化人成俗則王道斯貴時方撥亂屠販可以登朝世屬隆平經術然後升仕豐都爰肇儒服無預於周行建武之朝功臣不參於吏職自三方未一四海交爭不遑文教唯尚武功設官分職罕以才授班朝治人乃由勳敘莫非拔足行陣出自勇夫敦學之道既所不習政事之方故亦無取是非暗于在己威福專於下吏貪冒貨賄不知紀極蠹政害民實由於此自今已後諸授勳官者並不得回授文武職事庶遵彼更張取類於調瑟求諸名製不傷于美錦若吏部輒擬用者御史卽宜糾彈

恭帝義寧元年進封唐公爲王封建成元吉公爵 按隋書恭帝本紀義寧元年冬十一月甲子以光祿大夫大將軍太尉唐公爲假黃鉞使持節大都督內外諸軍事尙書令大丞相進封唐王己巳以唐王子隴西公建成爲唐國世子敦煌公爲京兆尹改封秦公元吉爲齊公食邑各萬戶

義寧二年詔唐王備九錫之禮位諸侯王上 按隋書恭帝本紀二年春三月戊戌詔唐王備九錫

之禮加璽紱遠遊冠綠綬綬位在諸侯王上唐國置丞相已下一依舊式五月乙巳朔詔唐王冕十有二旒建天子旌旗出警入蹕金根車駕備五時副車置旄頭雲罕車儼八佾設鐘虞宮懸王后王子王女爵命之號一遵舊典

唐

唐制王至子男列爵九等皆掌於吏部司勳 按唐書百官志吏部司封郎中員外郎掌封命朝會賜予之級凡爵九等一曰王食邑萬戶正一品二曰嗣王郡王食邑五千戶從一品三曰國公食邑三千戶從一品四曰開國郡公食邑二千戶正二品五曰開國縣公食邑千五百戶從二品六曰開國縣侯食邑千戶從三品七曰開國縣伯食邑七百戶正四品上八曰開國縣子食邑五百戶正五品上九曰開國縣男食邑三百戶從五品上

高祖武德元年秋七月戊寅約功臣恕死罪 按唐書高祖本紀云云

武德九年以立太子賜爲父後者襲勳爵 按唐書高祖本紀武德九年六月癸亥立秦王世民爲皇太子聽政賜爲父後者襲勳爵

太宗貞觀十一年六月戊辰以功臣爲世封刺史

按唐書太宗本紀云云

按文獻通考十一

年以司空長孫無忌爲趙州刺史改封趙國公尙書左僕射房元齡爲宋州刺史改封梁國公司空
杜如晦密州刺史改封萊國公特進李靖爲濮州刺史改封衛國公特進高士廉爲申州刺史改封
申國公趙郡王孝恭爲觀州刺史改封河間郡王同州刺史尉遲敬德爲宣州刺史改封鄂國公光
祿大夫李勣爲蘇州刺史改封英國公左驍衛大將軍段志元爲金州刺史改封襄國公右領軍大
將軍程知節爲普州刺史改封盧國公兵部尙書侯君集爲陳州刺史改封陳國公任城王道宗爲
鄂州刺史改封江夏郡王太僕卿劉弘基爲朗州刺史改封夔國公金紫光祿大夫張亮爲澧州刺
史改封鄴國公詔曰周武定業胙茅土於子孫漢高受命誓帶礪於功臣豈止重親賢之地崇其典
禮抑亦固盤石之基寄以藩翰但今之刺史古之諸侯雖立名不同而監統一也故申命有司斟酌
前代宣條委共理之寄象賢存代及之典司空無忌等並策名運始功叅締構卽令子孫世世承襲
非有大故無或黜免

貞觀十三年二月庚子停世封刺史

按唐書太宗本紀云云

高宗顯慶五年二月丙戌加佐命功臣食別封者子孫二階 按唐書高宗本紀云云

總章元年差弟太原元從西府功臣爲二等授其子孫官量加階爵 按唐書高宗本紀總章元年四月庚申以太原元從西府功臣爲二等第一功後官無五品者授其子若孫一人有至四品五品者加二階有三品以上加爵三等第二功後官無五品者授其子若孫從六品一人有至五品者加一階六品者二階三品以上爵一等

元宗開元五年五月丙辰詔公侯子孫襲封 按唐書元宗本紀云云

開元九年十一月庚午唐隆先天實封功臣坐事免若死者加贈 按唐書元宗本紀云云

開元十三年十一月庚寅封於泰山賜嗣王郡縣王一子官 按唐書元宗本紀云云

開元十七年以享太廟拜陵唐隆兩營立功三品以上予一子官 按唐書元宗本紀開元十七年十一月庚寅享於太廟丙申拜橋陵戊戌拜定陵己亥拜獻陵壬寅拜昭陵乙巳拜乾陵戊申至自乾陵唐隆兩營立功三品以上予一子官

開元二十年以祀后土賜武德以來及唐隆功臣三品以上一子官 按唐書元宗本紀開元二十

年十一月庚申如汾陰祀后土賜武德以來功臣後及唐隆功臣三品以上一子官

代宗廣德二年以郊祭賜武德功臣子孫官成都靈武元從及寶應功臣勳階爵級 按唐書代宗

本紀廣德二年二月乙亥有事於南郊己丑武德功臣子孫予一人官成都靈武元從三品以上加

賜爵一級餘加一階寶應功臣三品以上仍賜爵一級餘加階勳兩轉五品以上爲父後者勳兩轉

大曆五年六月己未錄魏徵王珪李靖李勣房元齡杜如晦之後 按唐書代宗本紀云云

大曆十四年六月己亥武德至德將相有功者子孫予官 按唐書德宗本紀云云

德宗興元元年正月癸酉復李希烈田悅王武俊李納官爵 按唐書德宗本紀云云

貞元元年八月襲封配饗功臣子孫十一月癸卯賜奉天興元扈從百官收京將士階勳爵 按唐

書德宗本紀云云

憲宗元和十五年正月辛丑皇太子卽皇帝位二月丁丑武德配饗及第一等功臣家子一子官

按唐書穆宗本紀云云

文宗太和元年二月乙巳賜九廟陪位者子孫二階立功將士階爵始封諸王後予一子官 按唐

書文宗本紀云云

僖宗光啟三年七月丁亥貞觀開元建中興元功臣後予一子九品正員官 按唐書僖宗本紀云云

昭宗大順二年四月甲申訪武德功臣子孫 按唐書昭宗本紀云云

乾寧二年十二月癸未復大順以來削奪官爵 按唐書昭宗本紀云云

天復元年二月辛未封朱全忠爲梁王四月丙子武德貞觀配饗功臣主祭子孫敘進之 按唐書

昭宗本紀云云

昭宣帝天祐二年十一月辛巳朱全忠爲相國總百揆封魏王 按唐書昭宣帝本紀云云

遼

太祖神冊六年夏五月丙戌朔詔正班爵 按遼史太祖本紀云云

太宗會同七年封趙延壽爲魏王 按遼史太宗本紀會同六年冬十一月辛卯上京留守耶律迪
輦得晉諜知有二心十二月丁未如南京議伐晉命趙延壽趙延昭安端解里等由滄恆易定分道

而進大軍繼之七年春正月甲戌朔趙延壽延昭率前鋒五萬騎次任丘丙子安端入鴈門圍忻代己卯趙延壽圍貝州其軍校邵珂開南門納遼兵太守吳繼投井死己丑次元城授延壽魏博等州節度使封魏王率所部屯南樂

世宗天祿元年以崇德宮戶賜翼戴功臣 按遼史世宗本紀天祿元年秋八月壬午以崇德宮戶分賜翼戴功臣及北院大王洼南院大王吼各五十安搏楚補各百

景宗保寧元年春三月己亥南院樞密使高勳封秦王冬十月乙巳蕭思溫封魏王 按遼史景宗本紀云云

保寧三年春正月辛酉南京統軍使魏國公韓匡美封鄴王 按遼史景宗本紀云云

保寧四年夏四月庚寅朔追封蕭思溫爲楚國王 按遼史景宗本紀云云

乾亨元年冬十二月乙卯燕王韓匡嗣遙授晉昌軍節度使降封秦王 按遼史景宗本紀云云

聖宗統和五年夏四月戊戌詔有司條上勳舊等第加恩 按遼史聖宗本紀云云

統和七年春二月乙卯大饗軍士爵賞有差樞密使韓德讓封楚國王 按遼史聖宗本紀云云